

Scrúdú Ardléibhéal 1 (C1)**Eolas ginearálta**

- Léiríonn an tábla thíos na rannóga éagsúla sa scrúdú, an céatadán de na marcanna atá ag dul do gach rannóg, an t-íosmharc atá riachtanach chun pas a fháil i ngach rannóg faoi leith, an pasmharc iomlán don scrúdú agus an méid ama atá ag dul do gach rannóg.

| Scrúdú Ardléibhéal 1 (C1) | | | |
|--|----------------------------|--|-------------------------------------|
| | <i>% den scrúdú iomlán</i> | <i>Íosmharc chun pas a fháil sa rannóg</i> | <i>Méid ama</i> |
| Cluastuisceant | 20% | 10% | 35 nóiméad |
| Léamhthuisceant | 20% | 10% | 60 nóiméad |
| Scríbhneoireacht | 20% | 10% | 75 nóiméad |
| Úsáid na Gaeilge | 20% | 10% | 45 nóiméad |
| Labhairt | 20% | 10% | 20 nóiméad + 30 nóiméad ullmhúcháin |
| Pasmharc don scrúdú iomlán: 60% | | | |
| Pas le gradam: 80% | | | |

- Tabhair faoi deara nach mbeidh pas tuillte ag iarrthóir mura n-éiríonn leis/léi an t-íosmharc a bhaint amach i ngach rannóg.
- Tabhair faoi deara nach leor an t-íosmharc a bhaint amach i ngach rannóg chun pas a fháil sa scrúdú iomlán.
- I gcás go dteipfeadh ar iarrthóir i *rannóg amháin*, is féidir tabhairt faoin rannóg áirithe sin arís an bhliain dár gcionn.

An scrúdú cluastuisceana: Ardléibhéal 1 (C1)

- Tá 4 ceist ar fad le freagairt sa chuid seo den scrúdú.
- Déan cinnte agus d'uimhir scrúdaithe a scríobh ar gach leathanach.
- Maireann an chuid seo den scrúdú timpeall **35 nóiméad**.
- Bainfear úsáid as ábhar dílis ón raidió, ón teilifís agus ón Idirlíon den chuid is mó. Beidh meascán canúintí i gceist.
- Tá teorainn leagtha síos don méid ama is ceadmhach a chaitheamh ar gach ceist.
- Nuair a bhíonn gá le freagraí scríofa, ní mór do fhreagraí na n-iarrthóirí a bheith i nGaeilge. Ní chaillfear marcanna as míltriú ná gramadach mhíchruinn, chomh fada agus atá an méid atá scríofa intuigthe. Ní gá abairtí iomlána a scríobh.
- Tabharfaidh an feitheoir leathanach bán duit chun gur féidir leat nótaí a scríobh le linn duit a bheith ag éisteacht leis na míreanna cluastuisceana.

Ceist 1

Cineál téacs: Píosa cainte as léacht nó cur i láthair.

Tasc: Beidh ar na hiarrthóirí ceist amháin nó dhá cheist ilrogha a fhreagairt.

Fócas: Beidh ar na hiarrthóirí éisteacht leis an mhír iomlán chun éirim nó brí iomlán an pháosa cainte a thabhairt leo. Ní gá go dtuigfeadh na hiarrthóirí gach rud sa mhír ach ba chóir go mbeidís in ann na straitéisí cuí a úsáid chun brí ghinearálta an téacs a thuiscint.

Cur chuige: Tabharfaidh an feitheoir an leathanach ar a bhfuil an cheist don iarrthóir. Ansin beidh **60 soicind** ag iarrthóirí leis an cheist a léamh sula ndéantar an mhír a sheinm.

Déanfar an mhír a sheinm uair amháin.

Nuair a bheidh an mhír cloiste ag na hiarrthóirí ba cheart dóibh an cheist/na ceisteanna a fhreagairt.

Ansin tógfaidh an feitheoir an leathanach ó gach iarrthóir.

Marcanna: 10

Ceist 2

Cineál téacs: Píosa cainte as léacht nó cur i láthair.

Bainfear úsáid as an téacs céanna éisteachta do Cheist 1 agus do Cheist 2.

Tasc: Beidh 6 cheist ar fad le freagairt. Bainfear úsáid as meascán de cheisteanna gairide, ceisteanna fíor/bréagach/ní deirtear agus ceisteanna ilrogha.

Fócas: Beidh ar na hiarrthóirí éisteacht go cúramach leis an mhír le heolas ar leith a aimsiú agus le tuairimí agus dearcadh a aithint, fiú má chuirtear na tuairimí nó an dearcadh sin in iúl go hindíreach.

Cur chuige: Tabharfaidh an feitheoir an leathanach ar a bhfuil an cheist do gach iarrthóir. Tá **nóiméad amháin** acu ansin leis na ceisteanna ar an leathanach a léamh.

Déanfar an mhír a sheinm uair amháin.

Ba cheart d'iarrthóirí na ceisteanna a fhreagairt le linn dóibh a bheith ag éisteacht leis an mhír.

Nuair a bheidh an mhír cloiste ag na hiarrthóirí beidh **dhá nóiméad** breise acu lena gcuid freagraí a sheiceáil.

Ansin tógfaidh an feitheoir an leathanach ó gach iarrthóir.

Marcanna: 12

Ceist 3

Cineál téacs: Agallamh nó píosa as agallamh.

Tasc: Beidh 6 cheist ar fad le freagairt. Bainfear úsáid as meascán de cheisteanna gairide, ceisteanna fíor/bréagach/ní deirtear agus ceisteanna ilrogha.

Fócas: Beidh ar na hiarrthóirí éisteacht chun príomhphointí, eolas nó mionsonraí faoi leith a aimsiú agus chun dearcadh agus tuairimí na gcainteoirí a aithint. Ba cheart go mbeidís in ann an t-eolas sin a aimsiú fiú má chuirtear in iúl go hindíreach é.

Cur chuige: Déanfar an mhír a sheinm uair amháin.

Ansin, tabharfaidh an feitheoir an leathanach ar a bhfuil na ceisteanna do gach iarrthóir. Tá **nóiméad amháin** ag na hiarrthóirí ansin leis na ceisteanna ar an leathanach a léamh.

Déanfar an mhír a sheinm uair amháin eile.

Ba cheart d'iarrthóirí na ceisteanna a fhreagairt le linn dóibh a bheith ag éisteacht leis an mhír.

Nuair a bheidh an mhír cloiste ag na hiarrthóirí beidh **dhá nóiméad** breise acu lena gcuid freagraí a sheiceáil.

Ansin tógfaidh an feitheoir an leathanach ó gach iarrthóir.

Marcanna: 12

Ceist 4

Cineál téacs: Mír as clár nuachta nó clár faoi chúrsaí reatha.

Tasc: Beidh 6 cheist ar fad le freagairt. Bainfear úsáid as meascán de cheisteanna gairide, ceisteanna fíor/bréagach/ní deirtear agus ceisteanna ilrogha.

Fócas: Beidh ar na hiarrthóirí éisteacht leis an mhír chun eolas agus mionsonraí ábhartha a thuiscint.

Cur chuige: Déanfar an mhír a sheinm uair amháin.

Ansin, tabharfaidh an feitheoir an leathanach ar a bhfuil na ceisteanna do gach iarrthóir. Tá **nóiméad amháin** ag na hiarrthóirí ansin leis na ceisteanna ar an leathanach a léamh.

Déanfar an mhír a sheinm uair amháin eile.

Ba cheart d'iarrthóirí na ceisteanna a fhreagairt le linn dóibh a bheith ag éisteacht leis an mhír.

Nuair a bheidh an mhír cloiste ag na hiarrthóirí beidh **dhá nóiméad** breise acu lena gcuid freagraí a sheiceáil.

Ansin tógfaidh an feitheoir an leathanach ó gach iarrthóir.

Marcanna: 12

An scrúdú léamhthuisceana: Ardleibhéal 1 (C1)

- Tá 4 cheist ar fad le freagairt sa chuid seo den scrúdú.
- Déan cinnte agus d'uimhir scrúdaithe a scríobh ar gach leathanach.
- Níl cead foclóirí a úsáid.
- Tá teorainn leagtha síos don méid ama is ceadmhach a chaitheamh ar gach ceist.
- Nuair a bhíonn gá le freagraí scríofa ní mór d'fhreagraí na n-iarrthóirí a bheith i nGaeilge. Ní chaillfear marcanna as litriú mícheart, fad is atá an méid atá scríofa intuigthe.
- Maireann an chuid seo den scrúdú **60 nóiméad** ar fad.

Ceist 1

Cineál téacs: Alt nó píosa faoi chúrsaí reatha as nuachtán, iris nó tréimhseachán.

Tasc: Beidh ar na hiarrthóirí ceist amháin nó dhá cheist ilrogha a fhreagairt.

Fócas: Éirim an ailt, an príomhdhearcadh nó an phríomhthuirim a nochtar san alt a aithint. Ní gá go ndéanfadh iarrthóirí gach cuid den alt a léamh agus ní gá go dtuigfidís gach rud san alt ach ba chóir go mbeidís in ann na straitéisí cuí a úsáid chun brí ghinearálta an téacs a thuiscint.

Cur chuige:

Tabharfaidh an feitheoir an leathanach ar a bhfuil an cheist do gach iarrthóir. Beidh **nóiméad amháin** ag na hiarrthóirí leis an cheist a léamh.

Anois tabharfaidh an feitheoir an téacs do gach iarrthóir.

Tá **5 nóiméad** ag iarrthóirí leis an téacs a léamh agus an cheist a fhreagairt.

Nuair a bheidh 5 nóiméad istigh déanfaidh an feitheoir an leathanach ar a bhfuil an cheist a thógáil ó gach iarrthóir.

Marcanna: 10

Ceist 2

Cineál téacs: Bainfear úsáid as an téacs céanna léitheoireachta i gCeist 2 & i gCeist 1.

Tasc: Tabharfar 8 n-abairt do na hiarrthóirí agus beidh orthu an t-eolas atá sna habairtí sin a mheitseáil leis an áit a bhfuil an t-eolas sin le fáil sa téacs féin.

Fócas: Déanann an cheist seo tástáil ar mhiontuiscint na n-iarrthóirí ar an téacs agus ar a gcumas chun argóintí / eolas a aithint agus a aimsiú.

Cur chuige:

Beidh **15 nóiméad** ag iarrthóirí leis an téacs a léamh agus an cheist a fhreagairt.

Nuair a bheidh 15 nóiméad istigh tógfaidh an feitheoir an leathanach ó gach iarrthóir.

Marcanna: 16

Beidh 40 nóiméad agat le Ceist 3 agus Ceist 4 a dhéanamh.

Ceist 3

Téacs: Alt nó sliocht as leabhar, as alt, as leathanach Idirlín nó as bróisiúr.

Tasc: Beidh ar na hiarrthóirí an abairt cheart a roghnú le cur i ngach bearna sa téacs.

Beidh 10 n-abairt ann agus 8 mbearna le líonadh.

Fócas: Caithfidh iarrthóirí a léiriú go bhfuil tuiscint acu ar an struchtúr a bhíonn ar théacsanna agus ar an chaoi a ndéantar forbairt ar théacs agus ar smaointe.

Cur chuige: Ba cheart d'iarrthóirí an cheist atá ar an pháipéar scrúdaithe agus an téacs ar an chéad leathanach eile a léamh. Ansin, caithfidh iarrthóirí an abairt cheart (1-10) a roghnú le cur i ngach bearna. Tá dhá abairt ann nach mbainfear úsáid astu. Ba cheart an uimhir cheart a scríobh i ngach bearna san alt.

Marcanna: 16

Ceist 4

Téacs: Litir nó ríomhphost foirmiúil.

Tasc: Tá dhá thasc sa cheist seo.

Tasc A: Meascán de cheisteanna gairide, ceisteanna ilrogha, agus ceisteanna fíor/bréagach/ní deirtear. I gcás na gceisteanna fíor/bréagach/ní deirtear- beidh ar iarrthóirí fianaise a sholáthar ón téacs le tacú leis an rogha a dhéanann siad – is é sin má roghnaíonn siad ‘fíor’ nó ‘bréagach’. Sna ceisteanna sin bronnfar marc amháin as an rogha cheart a dhéanamh agus bronnfar marc amháin chun an fhianaise cheart a sholáthar.

Fócas: Déantar tástáil ar chumas na n-iarrthóirí pointí caolchúiseacha / eolas nó tuairimí a chuirtear in iúl go hindíreach a aithint agus a aimsiú.

Marcanna: 12

Tasc B: Tugtar ceithre shainmhíniú do na hiarrthóirí agus bíonn orthu focail a aimsiú ón téacs le meitseáil leis na sainmhínithe.

Fócas: Déantar tástáil ar stór focal na n-iarrthóirí.

Marcanna: 4

Scríbhneoireacht: Ardleibhéal 1 (C1)

- Mairfidh an chuid seo den scrúdú **75 nóiméad** ar fad.
- Ní bheidh cead ag iarrthóirí úsáid a bhaint as foclóirí nó aon áiseanna tagartha eile.
- Caithfidh na hiarrthóirí a léiriú go bhfuil smacht maith acu ar an ghramadach agus go bhfuil siad in ann déileáil leis an réimse leathan struchtúr, stór focal agus feidhmeanna atá riachtanach don leibhéal seo. Féach na samplaí scríbhneoireachta i **Siollabas C1**. Ba cheart go mbeidís in ann cibé téacs atá á scríobh acu a leagan amach de réir na nósanna cuí a bhaineann lena leithéid de théacs ag cur san áireamh an duine / daoine ar a bhfuil an téacs dírithe.
- Caillfear marcanna mura gcloítear leis an teorainn focal.
- Moltar go láidir d'iarrthóirí aire faoi leith a dhéanamh den pheannaireacht.
- Tabharfar breithiúnas ar na rudaí seo a leanas: réimse agus cruinneas struchtúr agus gramadaí, réimse foclóra, an t-ábhar agus an chaoi a ndéantar an t-ábhar a fhorbairt (eagrú agus forbairt smaointe, leanúnachas agus araile).
- Moltar d'iarrthóirí roinnt ama a chaitheamh *ag pleanáil* agus *ag leagan amach* an méid atá le scríobh agus ansin *ag déanamh eagarthóireachta* agus *súil siar* ar an méid atá scríofa acu.
- Cuirfear páipéar ar fáil le haghaidh obair gharbh.
- Tá dhá cheist sa rannóg seo.

Ceist 1

- Beidh ar iarrthóirí litir, léirmheas, tuairisc, teistiméireacht, ríomhphost, iarratas nó alt a scríobh. Beidh rogha acu idir trí cheist.
- Cuirfear eolas ar fáil faoi chuspóir an téacs agus faoin lucht léitheoireachta ar a bhfuil sé dírithe.
- Ba cheart do na hiarrthóirí timpeall **200-250 focal** a scríobh sa spás atá leagtha amach.

Ceist 2

- Beidh rogha ag iarrthóirí idir trí cheist. Beidh orthu ráiteas a léamh agus aiste nó alt a scríobh ina ndéanann siad cur síos ar an dearcadh atá acu maidir leis an ráiteas. Ba cheart go mbeadh an t-alt nó an aiste oiriúnach le haghaidh nuachtáin nó irise.
- Ní chuirfear aon treoir ar fáil maidir leis an méid a bheidh le scríobh ag na hiarrthóirí. Caithfidh siad a léiriú go bhfuil siad in ann argóint a eagrú agus a fhorbairt ar bhealach atá ciallmhar agus loighciúil.
- Ba cheart do na hiarrthóirí timpeall **550-580 focal** a scríobh sa spás atá leagtha amach.

Úsáid na Gaeilge: Ardleibhéal 1 (C1)

- Mairfidh an chuid seo den scrúdú **45 nóiméad** ar fad.
- Ní bheidh cead ag iarrthóirí úsáid a bhaint as foclóirí nó aon áiseanna tagartha eile.
- Moltar d'iarrthóirí aird faoi leith a thabhairt ar an litriú agus ar chruinneas gramadaí.
- Tá cúig cheist ar fad sa rannóg.

Ceist 1

Beidh téacs le léamh agus focal cuí le scríobh i ngach bearna. **Focal amháin** a bheidh le scríobh i ngach bearna. Níor cheart níos mó ná focal amháin a scríobh. Beidh 20 bearna ar fad sa téacs. Caithfidh an focal a bheith oiriúnach ó thaobh na céille de agus ceart ó thaobh na gramadaí de chun iomlán na marcanna a fháil.

Marcanna: 2 mharc an ceann (40 marc san iomlán)

Ceist 2

Beidh cúig abairt le haistriú go Gaeilge.

Marcanna: 5 mharc an ceann (25 marc san iomlán)

Ceist 3 & 4 & 5

Díreofar ar ghnéithe éagsúla den ghramadach sna ceisteanna seo. Féach **Siollabas B2** agus **Siollabas C1** le cur síos a fháil ar na réimsí gramadaí atá riachtanach don leibhéal seo. Beidh abairtí le hathscríobh, míreanna éagsúla le ceangal le chéile agus araile. Ní gá gurb iad na gnéithe céanna a bheadh á dtástáil sa chuid seo den scrúdú ó bhliain go bliain.

Marcanna: 20 do gach ceist.

An Scrúdú cainte: Ardleibhéal 1 (C1)

- Iarrthóir amháin a bheidh faoi scrúdú ag aon am faoi leith.
- Beidh beirt i mbun an scrúdaithe. Beidh duine amháin ag cur na gceisteanna agus i mbun stiúrtha agus measúnachta agus beidh an duine eile i mbun measúnachta an t-am ar fad agus ní bheidh sé/sí páirteach sa chomhrá.
- Déanfar gach scrúdú cainte a thaifeadadh.
- Tá trí rannóg sa scrúdú cainte seo.
- Déanfar measúnú ar na rudaí seo a leanas: cruinneas, stór focal, foghraíocht, cumarsáid agus bainistiú cumarsáide. Níl marc faoi leith ag dul do gach rannóg ach déanfar iarrthóirí a mheas de réir mar a éiríonn leo sa scrúdú cainte iomlán.

Cuid 1 (Cur i láthair)

- **Seacht lá** roimh dháta an scrúdaithe cuirfear liosta de **thrí thopaic** chuig gach iarrthóir. Gheobhaidh gach iarrthóir an liosta céanna topaicí. Moltar don iarrthóir ullmhúchán ginearálta a dhéanamh ar na topaicí (stór focal, mar shampla). Beidh ar iarrthóirí labhairt faoi cheist/ráiteas a bhaineann le ceann amháin de na topaicí sin lá an scrúdaithe. Cuirfear in iúl don iarrthóir lá an scrúdaithe cé acu topaic a bheidh aige/aici.
- Ar lá an scrúdaithe, ba cheart go mbeadh iarrthóirí i láthair sa seomra cuí **35 nóiméad** roimh thús an scrúdaithe. Tabharfar bileog don iarrthóir ar a mbeidh an topaic don chur i láthair mar aon le ceist / ráiteas faoin topaic a bheidh le plé le linn an chur i láthair. Ansin, beidh **30 nóiméad** ag an iarrthóir leis an chur i láthair a ullmhú. Cuirfear cártaí ar fáil do gach iarrthóir chun gur féidir leo pointí gairide a bhreacadh síos le iad a threorú le linn an chur i láthair. Ní bheidh cead ag iarrthóirí úsáid a bhaint as foclóirí ná aon áiseanna eile le linn dóibh a bheith i mbun ullmhúcháin.
- Nuair a thiocfaidh an t-iarrthóir isteach sa seomra scrúdaithe cuirfear roinnt ceisteanna ginearálta air/uirthe ar dtús. Ansin, tabharfar cuireadh dó / di an cur i láthair a dhéanamh. Mairfidh an cur i láthair **5 nóiméad** ar fad. Cuirfidh an

scrúdaitheoir in iúl don iarrthóir nuair a bheidh nóiméad amháin fágtha. Moltar go láidir d'iarrthóirí cloí leis an teorainn ama.

- Nuair a bheidh an cur i láthair críochnaithe cuirfidh an scrúdaitheoir roinnt ceisteanna ar an iarrthóir maidir leis an ábhar. Seans go n-iarrfar air/uirthi forbairt a dhéanamh ar phointí áirithe, pointí a chosaint, samplaí a sholáthar agus a leithéidí. Ní mhairfidh an chuid seo den scrúdú níos mó ná **3 nóiméad**.
- Ní bheifear ag súil go mbeidh aon saineolas ag iarrthóirí maidir le hábhar an chuir i láthair ach táthar ag súil go gcloífidh siad leis an téama agus go mbeidh na samplaí a thugann siad nó na pointí a dhéanann siad bainteach leis an ábhar.
- Beifear ag súil le hiarrthóirí a bheith in ann a gcuid tuairimí, smaointe agus argóintí a chur i láthair ar bhealach eagraithe, soiléir agus comhleanúnach.

Cuid 2 (Ceisteanna ghinearálta)

- Comhrá faoi ábhair ghinearálta idir an t-iarrthóir agus an scrúdaitheoir a bheidh sa chuid seo den scrúdú.
- I measc na n-ábhar a d'fhéadfaí a phlé tá nithe a bhaineann le saol an duine féin, mar shampla: cúrsaí oibre, taisteal agus ábhair níos teibí, mar shampla, na meáin chumarsáide, cúrsaí sóisialta agus dlí, an pholaitíocht agus cúrsaí reatha.
- Beidh ar na hiarrthóirí a dtuairimí a chur in iúl, a fhorbairt agus a chosaint nuair is gá chomh maith le bheith in ann pointí a chur in ord tosaíochta agus achoimre a dhéanamh ar a bhfuil ráite acu.
- Mairfidh an chuid seo den scrúdú cainte **10 nóiméad**.

Cuid 3 (Ag labhairt faoi phictiúir)

- Tabharfaidh an scrúdaitheoir bileog don iarrthóir. Beidh sraith de thrí phictiúir chomh maith le ceist a bhaineann leis na pictiúir ar an bhileog seo.
- Beidh **nóiméad amháin** ag iarrthóirí le breathnú ar na pictiúir agus smaoinreamh faoin cheist.
- Agus iad ag freagairt na ceiste caithfidh iarrthóirí labhairt faoi dhá cheann de na pictiúir atá ar an bhileog. Níl sé i gceist go ndéanfadh iarrthóirí cur síos lom ar a bhfuil le feiceáil i ngach pictiúir. Ina ionad sin ba cheart dóibh comparáid a dhéanamh eatarthu, tuairimí a nochtadh ina dtaobh, hipitéis a chur in iúl faoi na daoine atá sna pictiúir agus na rudaí atá ar siúl acu, mar shampla.
- Beidh **2 nóiméad** ag an iarrthóir le labhairt faoi na pictiúir agus aon cheisteanna a chuirfidh an scrúdaitheoir air a fhreagairt.